

Baluwa jha Pauli kwa Filimone Ulongolelo

Kitabo chenje kihipe cha Filimone kikajhandikwe na ntenga Pauli, mu chula jha 1:1. Pauli pakibha mukipungo ku Loma pajhandika kitabo, yenio pange iwechekana ajhandika pakibha ku Loma na anda akibha ku Loma bhahe, iwechekana kikajhandikwe muchaka cha makome chita na limo kubhoke pabhelwika Yecho Kilichitu, ndi chaka cheche pange iwechekana pajhandika kitabo cha Akakolochahe.

Pauli anyandikila baluwa jhenje mundo jhumo liina lyake Filimone. Filimone akibha jhumo pakate jha lilongo lya bhandu lilinnyeketii Kili-chitu na helahela akibha na akabhanda bhake. Pauli anyandikila kupala kunnyopa akotoka ku-napula mmanda gwake jwakemitwa Onechimo jwanywogholwike kubhoke kwa Filimone. Kwa malaghilo gha Kiloma Filimone apalitwa ankome Onechimo. Pauli ngampembelekiya Filimone na kunneke mwojho annyeketele Onechimo ngita nnongo mu kulombona na Kilichitu, helahela annyopa annekekeye Onechimo ahenge lihengo pamo na Pauli, mu chula jha 1:13-14.

Ghughabhii mukitabo

Pauli innyambucha Filimone, mu chula jha 1:1-3.

Kabhele Pauli innyopa Filimone ampokele Onechimo ngita nnongo mu Kilichitu, mu

chula jha 1:4-21.

Pauli ijhomolela kwa kutangacha mawacho ghake gha kwatyangila na kwajhambucha, mu chula jha 1:22-25.

¹ Ne Napauli, napungwa ku nhwalo gwa kunge Kilichitu Yecho. Mmii pamba pamonga na nnongo gwito Timocheyo.

Tunnyandikii mwe makoche bhito ma Filimone, nhenga lihengo nnyito,

² na lilongo lya bhando lilinyeketii Kilichitu lilikongina kajhino na mwenga nnombo gwito Afiya na kwa nkomana ngondo nnyito Alukipo.

³ Ninyope umbone nu uteeke kuhumii kwa Chapanga Tate gwito na Bhambo Yecho Kilichitu.

Upalo na kihobholelo cha Filimone

⁴ Machiko ghoha puninnyopa Chapanga ninkomboka mwe ma Filimone nu kunchenguu Chapanga gwango,

⁵ nhwalo nnyohine chimuhobholela Bhambo Yecho na chimapala bhando bha Chapanga bhoha.

⁶ Ninnyope kwa Chapanga kupala kihobholelo chino chenye chimihenga pamonga na twenga kwa Chapanga, kijhingii nkate hake na nphoto kubhehe na uhotolo gwa kumanya hake na mota yoha itupata kwa kulombana na Kilichitu.

⁷ Nnongo gwango, lipalano lino linhalalii hake na linneki mwojho! Mwenga mihanganiche miojho jha bhando bhoha bha Chapanga.

Pauli annyopa Filimone ampoke Onechimo

⁸ Ku nhwalo gwenio, na nenga nalongo gwino kwa kulombana na Kilichitu, ngahotwi kun-naghalikiya changajhohopa nhenge chimipala kuhenga.

⁹ Nambo nhwalo nimpala, mbaha ninnyope, ndenda naha ihoto kubhehe ne Pauli ng'oime, na ngohe napungwa ku nhwalo gwa kunhenge Kilichitu Yecho.

¹⁰ Yenie ninnyopa muntangatile Onechimo, jwakibha mwanango kwa kulombona na Kilichitu putukibha mu kipungo.

¹¹ Makacho akibha kilebhenacho, nambo ngohe abhii na lihengo kwa nenga na kwino mwenga hele.

¹² Ngohe nimujhicha kabhele kwino, jwenio ngita mwojho gwango.

¹³ Nikapahi atame na nenga, antendele lihengo lende lyu kuntangatii mwe kone mmii mombo mu kipungo, ku nhwalo gwa kwatangachii bhando Lilobhe lya Mbone.

¹⁴ Nambo mbahijhe kunchokolekeya undangatile, nambo nipala nhenge chimipala, yenio nihenga jhe chochoha ade mabhene nnyeketele.

¹⁵ Pange Onechimo natama na mwenga kwa machiko ghandina tugh, abhujha kabhele kwino ntame nako machiko ghoha.

¹⁶ Ngohe jwenio mmanda kabhe jhe, nambo jwenio jwaumbone kuliku mmanda, jwenio ngohe nnongo gwito mu kulombana na Kilichitu. Ambahi nenga na impala mwenga hake, nhwalo jwenio ngita nnyito na nnongo mu kulombana na Bhambo.

¹⁷ Bhahe, anda umona ne kubhehe nalongo bhino ku kulombana na Bhambo, mumpokela Onechimo ngita hela ngaumbokii nenga.

¹⁸ Anda antendi chochoha changanandela, amu abhii na lighambo kwino, nanepa nenga.

¹⁹ Ne Pauli nijhandika namwete kwa lubhoko lwango, naninepa! Mbaijhe nikomboche unnepe ughome gwino.

²⁰ Bhahe, nnongo gwango, undendela yenio ku kundangatii nenga ku nhwalo gwa Bhambo, ngohe mwe malongo bhango mu kulombana na Kilichitu muhanganiche mwojho gwango.

²¹ Nhwalo chakaka ninhobholela, ninnyandikii ghanga, manye nanhenga kupeta ghanga ghunin-nobholile.

²² Pamonga na gheniya, unenganikiye chumbi chukugholoka nhwalo ghu kujhopa kwino ninhobholela Chapanga najhangula, na nenga nantyangila kwenio.

Nyambuchilo jha kujhomolela

²³ Epafula, mpungwa nnyango ku nhwalo gwa kunhenge Kilichitu Yecho, innyambucha.

²⁴ Helahela akahenga mahengo bhajhango Maluku na Alichitako na Dema na Luka, na bhene bhinnyambucha.

²⁵ Umbone gwa Bhambo gwito Yecho Kilichitu utame pamonga umiojho jhino.

Ndendeule

Ndendeule: Ndendeule (New Testament) for Tanzania

copyright © 2020 The Word for the World International

Language: (Ndendeule)

Contributor: The Word for the World International

The New Testament in Ndendeule Language.

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 1 May 2025 from source files dated 1 May 2025

463e1ded-27ea-5916-a8ed-170cdb8d87e3